

**Sumáriu Kazu
Tribunál Judisiál Primeira Instáncia Oekusi
Novembru 2023**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Oekusi

1. Totál kazu ne'ebé JSMP monitoriza: 4

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, 35 (b) no 36 Lei Kontra Violénsia Doméstika (LKVD))	Ofensa ba integridade física simples ho natureza violénsia doméstika no tipu ilícitu sira kona-ba violénsia doméstika.	2
Artigu 145 KP	Ofensa ba integridade física simples	1
Artigu 23, 24 KP no artigu 263 KP	Tentativa inséndiu	1
Totál		4

2. Totál desizaun ne'ebé JSMP monitoriza : 3

Tipu desizaun	Artigu	Númeru
Admoestasaun	Artigu 82 KP	1
Omologa pedidu dezisténsia keixa	Artigu 262 KPP	1
Absolve		1
Totál		3

3. Total kazu sira ne'ebé kontinua prosesu tuir JSMP nia monitorizasaun : 1

B. Deskripsaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0038/22.OEPMK
Kompozisaun Tribunál : Singulár
Juis : Dr. Argentino Luisa Maria Nunes
Prokuradór : Dr. Mateus Nesi
Defeza : Dr. Afonso Fátima Gomes
Desizaun : Pena admoestasaun

Iha 15 Novembru 2023, Tribunál Judisiál Primeira Instánsia Oekusi prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu FN hasoru nia feen, iha RAEOA.

Akuzasaun Prokuradór

Prokuradór akuza katak iha 17 Agostu 2023, maizumenus iha oras tuku 07:30 dadeer, arguidu ho lezada diskuti malu kona-ba sira nia oan ne'ebé maka sempre sai to'o kalan foin maka tama uma, arguidu foti fatuk atu tuda lezada maibé la konsege tanba lezada halai ba hakuak metin arguidu, nune'e arguidu lori fatuk ne'ebé arguidu kaer hela iha liman hodi tuku dala ida iha lezada nia reen-toos. Konsekuénsia husi arguidu nia hahalok ne'e rezulta lezada sente moras, bubu no raan iha lezada nia reen-toos. Kazu ne'e aneksa hamutuk ho relatóriu médiku husi PRADET no fotografia sira hasai husi polísia.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penal too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu la marka prezensa ho razaun arguidu moras grave. Tanba ne'e, bazeia ba artigu 258 KPP kona-ba dispensa ba arguidu nia prezensa, nune'e iha kazu ne'e arguidu nia defeza maka reprezenta arguidu.

Entretantu lezada kontinua konfirma faktu hotu iha akuzasaun no deklara katak depoisde akontesementu arguidu husu fali deskulpa ba lezada no kontinua dame malu kedas to'o agora laiha ona problema seluk no agora dadaun arguidu sofre hela moras grave no lao ladi'ak.

Testemuña nu'udar viziñu depoimenta katak iha akontesementu ne'e haree arguidu kaer duni fatuk tuku ba iha lezada nia reen-toos maka lezada halai sai. Testemuña hanesan viziñu ho arguidu ho lezada iha tempu naruk nia laran, foin primeiravés haree arguidu komete aktu ne'e hasoru nia feen.

Alegasaun finál

Prokuradór iha nia alegasaun hateten katak kumprende duni arguidu nia kondisaun ne'ebé moras grave hodi audensia ne'e lao sein prezensa husi arguidu no konfirma mós husi lezada, mezmu nune'e prokuradór nafatin konsidera hahalok arguidu nian priense duni elementu husi krime ofensa ba integridade física simples ho natureza violénsia doméstika, nune'e husu ba tribunál atu kondena arguidu ho pena prizaun maibé suspende ninia ezekusaun.

Entretantu husi parte defeza husu ba tribunál atu fó pena admoestasaun ba arguidu ho konsiderasaun katak arguidu ho kondisaun moras grave no bazeia ba lezada nia deklarsaun katak, depoisde akontesementu ne'e sira di'ak malu kedas no reforsa mós ho depoimentu testemuña nian katak arguidu foin primeiravés komete krime hasoru lezada.

Desizaun

Depoisde avalia faktu hotu, tribunál konsidera faktu hotu provadu. Bazeia ba faktu provadu sira ne'e no tetu mós ho sirkunstánsia atenuantes sira ne'ebé haleu krime ne'e. Nune'e tribunál konklui prosesu ne'e no kondena arguidu ho pena admoestasaun.

2. Krime ofensa ba integridade física simples

Nú. Prosesu : 0021/22.OEOSL
Kompozisaun Tribunál : Singulár
Juis : Dr. Argentino Luisa Maria Nunes
Prokuradór : Dr. Mateus Nesi
Defeza : Dr. Afonso Fátima Gomes.
Desizaun : Omologa pedidu dezisténsia keixa

Iha 15 Novembru 2023, Tribunál Judisiál Primeira Instánsia Oekusi prezide julgamentu tentativa konsiliaun ba krime ofensa ba integridade física simples ne'ebé envolve arguidu Jacinto Sufa hasoru nia alin Baltazar Sufa, iha Aldeia Sifin, Suku Usitasae, Postu Administrativu Oesilo, RAEOA.

Akuzasaun prokuradór

Prokuradór akuza katak iha 19 Outubru 2022, maizumenus iha oras tuku 19:00 kalan, arguidu tebe dala-ida iha lezadu nia hirus matan no tuku dala-ida iha lezadu nia hasan parte loos no karuk rezulta lezadu sofre moras. Kazu ne'e akontese bainhira lezadu ho arguidu sira nia inan moras maibé lezadu la ba haree, nune'e arguidu komete aktu ne'e hasoru lezadu. Kazu ne'e aneksa hamutuk ho relatóriu médiku husi Sentru Saude Oesilo no fotografia sira hasai husi polísia.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penal to'o tinan 3 ka multa.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu. Iha prosesu konsiliaun ne'e, lezadu hakarak dame malu ho arguidu hanesan nia maun sein kondisaun maibé importante mak arguidu bele respeitu lezadu hanesan alin. Arguidu mós konkorda ho lezadu nia pedidu ne'e no deklara katak arrepende ninia hahalok no promete sei la repete tan hahalok hanesan iha futuru. Tanba ne'e, arguidu simu pedidu ne'e, nune'e lezadu husu ba tribunál atu deziste tiha ninia-keixa hasoru arguidu.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu, nune'e tribunál konklui prosesu ne'e no omologa akordu dame ne'e sein kondisaun ruma.

3. Krime tentativa inséndiu

Nú. Prosesu	: 0060/19.OEPMK
Kompozisaun Tribunál	: Koletivu
Juis	: Dr. Argentino Luisa Barros : Dra. Florencia Freitas : Dr. Jose Quintão
Prokuradór	: Dr. Mateus Nessi
Defeza	: Dr. Afonso Fátima Gomes
Desizaun	: Absolve

Iha 23 Novembru 2023, Tribunál Judisial Primeira Instánsia Oekusi prezide leitura akordaun ba krime insendiu ne'ebe envolve arguidu Gilberto Antonio Meco Cofitalan hasoru nia tiu Agostinho Fransisco Meco, Iha Aldeia Boen-mese, Suku Naimeco, Postu-Administrativu Pante-makassar, RAEOA.

Akuzasaun Prokuradór

Prokuradór akuza katak iha 16 Novembru 2019, maizumenus iha oras tuku 02:20 madrugada, arguidu sunu uluk meza ida iha varanda uma oin nian hafoin kontinua uza ahi-kose hodi sunu lezadu nia uma. Ho ida ne'e lezadu ho testemuña Markus Marques ho Adelaide Meco halai sai husi uma laran hodi rega mate ahi no kontinua kaer arguidu. Depoizde akontesimentu lezadu ba apresenta keixa iha Polísia Eskuadra Pante-makassar.

Prokuradór akuza arguidu kontra artigu 23, 24 KP no 263 KP kona-ba tentativa krime inséndiu ho moldura penal tinan 2 too tinan 8 prizaun.

Produsaun ba prova sira

Iha prosesu julgamentu, arguidu deklara katak faktu sira ne'ebé hakerek iha akuzasaun ne'e loos hotu. Arguidu mós deklara katak foin primeiravés mai hatan iha tribunál, arrepende nia hahalok no deklara katak iha akontesementu ne'e arguidu ho kondisaun lanu no ho nervozu tanba problema família, maibé agora sira di'ak malu ona arguidu husu ona deskulpa tanba iha relasaun família hanesan tiu ho subriñu. Arguidu promete sei larepete hikas nia hahalok hasoru lezadu no arguidu hanesan estudante laiha rendimentu fiksi kada fulan.

Alende ne'e, lezadu kontinua konfirma faktu sira iha akuzasaun, lezadu mós deklara katak mezmu nune'e ahi la konsege han meja no mós uma, lezadu deklara liután katak

agora daudaun sira di'ak malu ona no iha lia mate ka moris sempre hamutuk hanesan familia.

Testemuña Adelaide Meco hanesan lezadu nia alin depoimenta katak momentu akontesimentu ne'e testemunã iha uma laran no rona lutu tarutu maka nia hader hodi hafuhu no hare'e arguidu kaer ahi-kose hodi sunu tali tahan ba tau iha meza okos maka testemuña Adelaide Meco hakilar hodi bolu nia maun sira no halai sai ba halo impedimentu kedas no kaer arguidu, hodi foti bee rega mate ahi ne'ebé foin mak hahú lakan. Testemuña akresenta liután katak depoisde akontesementu, arguidu buka tuir nia tiun husu ona deskulpa no diak malu ona hanesan babain.

Alegasaun finál

Prokuradór konsidera arguidu provadu komete duni krime refere, bazeia ba konfisaun arguidu nian, arguidu ho intensaun atu sunu uma maibé la konsege tanba hetan impedimentu husi testemuña sira mezmú arguidu nia hahalok ne'e seidak konkretiza. Tanba husu ba tribunál atu kondena arguidu tuir artigu 263 KP, atu nune'e labele repete tan nia hahalok iha futuru no ema seluk labele halo tuir.

Enkuantu defeza husu ba tribunál atu aplika pena ne'ebé adekúadu ba arguidu ho konsiderasaun sira katak tuir deklarasaun testemuña nian arguidu la sunu uma maibé sunu deit tali tahan soe deit iha meza okos. Defeza reforsa liután katak depoisde akontesementu arguidu arrepende hodi buka tuir lezadu no husu ona deskulpa, sira mós di'ak malu ona tanba sira mesak familia de'it, hanesan estudante laiha rendimentu fiksi kada fulan no promete sei larepete hikas hahalok ne'e iha futuru hasoru lezadu ka ema seluk.

Desizaun

Depoisde avalia ba faktu sira hotu tribunál la prova katak arguidu komete krime tentativa inséndiu, maibé arguidu nia intensaun ne'e apenas atu hatauk de'it lezadu ho testemuña sira tanba antes ne'e sira iha ona problema. Tanba ne'e, arguidu foti du'ut sunu duni soe ba iha meja okos bazeia ba deklarasaun husi testemuña hafoin haree testemuña sira ba halo kedas impedimentu no lezadu mós deklarata katak ahi la konsege han meja no uma. Ho nune'e tribunál konklui prosesu ne'e no absolve arguidu husi aktu refere tanba laiha prova ne'ebé sufisiente hodi kondena arguidu.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl